

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

## RJEŠENJE

po Prijavi namjere koncentracije privrednog subjekta Telekom Slovenije, Cigaletova 15, Ljubljna, Republika Slovenija i privrednog subjekta Aneks d.o.o. Krajiških brigada 113, Banja Luka

Sarajevo  
15. 01. 2008. godine



Broj: 01-03-26-035-6-II/07  
Sarajevo, 15. 01. 2008. godine

Na osnovu člana 25. stav (1) tačka e) člana 42. stav (1) tačka d) člana 43. stav (2), a u vezi sa čl. 12., 14., 16. i 18. Zakona o konkurenciji ("Službeni glasnik BiH", broj 48/05 i 76/07), rješavajući po Prijavi namjere koncentracije privrednih subjekata Telekom Slovenije d.d., Cigaletova 15, Ljubljana, Republika Slovenija i Aneks d.o.o., Krajiških brigada 113, Banja Luka, zaprimljene pod brojem 01-0-26-035-II/07 dana 10.10.2007. godine, Konkurencijsko vijeće na 58. sjednici održanoj dana 15. 01. 2008. godine donijelo je

### **R J E Š E N J E**

1. Ocjenjuje se dopuštenom koncentracija koja će nastati na tržištu pružanja internet usluga, usluga fiksne telefonije (kao segmenata telekomunikacijskih usluga) i pružanja usluga iz oblasti računarskih mreža, u Bosni i Hercegovini sticanjem kontrole kupovinom većine udjela u osnovnom kapitalu, kojim će privredni subjekt, Telekom Slovenije d.d., Cigaletova 15, Ljubljana, Republika Slovenija postati 70% vlasnik privrednog subjekta Aneks d.o.o., Krajiških brigada 113, Banja Luka .
2. Ovo Rješenje je konačno i upisuje se u Registar koncentracija.
3. Ovo Rješenje biće objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

### **O b r a z l o ž e n j e**

Privredni subjekt Telekom Slovenije, Cigaletova 15, Ljubljana, Republika Slovenija (u daljem tekstu: Telekom Slovenije ili podnosilac Prijave), putem ovlaštenog advokata Seada Miljkovića, Fra Andela Zvizdovića 1, Sarajevo, je podnio Konkurencijskom vijeću Bosne i Hercegovine Prijavu namjere koncentracije (u daljem tekstu: Prijava), kojom podnosilac Prijave želi kupovinom većine udjela u osnovnom kapitalu steći 70% vlasništvo nad privrednim subjektom, Aneks d.o.o., Krajiških brigada 113, Banja Luka (u daljem tekstu: Aneks).

Prijava namjere koncentracije podnesena je Konkurencijskom vijeću dana 10.10.2007. godine pod brojem 01-0-26-035-II/07, u skladu sa članom 16.stav (1) Zakona o konkurenciji (u daljem tekstu: Zakon).

Uvidom u dostavljenu Prijavu, Konkurencijsko vijeće je utvrdilo da ista nije potpuna, u smislu člana 30. Zakona, te je u skladu sa članom 31. Zakona o konkurenciji (u daljem tekstu : Zakon) zatražilo dopunu Prijave, dopisom broj 01-03-26-035-2-II/07, dana 19.11.2007.godine.

Podnosilac Prijave je u skladu sa zahtjevima Konkurencijskog vijeća dopunio Prijavu dana 22.11.2007.godine, pod brojem 01-03-26-035-3-II /07.godine.

Prijemom tražene dokumentacije Konkurencijsko vijeće je utvrdilo da je Prijava kompletna i izdalo je Potvrdu o prijemu kompletne i uredne Prijave, dana 13.12.2007.godine, pod brojem 01-03-26-035-5-II/07, u skladu sa članom 30.stav 3) Zakona.

Podnosilac Prijave koncentracije nema obavezu podnijeti Prijavu za ocjenu koncentracije, ni jednom drugom tijelu ovlaštenom za ocjenu koncentracije, izvan teritorije Bosne i Hercegovine.

Analizom podataka navedenih u Prijavi, Konkurencijsko vijeće je utvrdilo da učesnici predmetne koncentracije po završnom računu u 2006.godini, kao finansijskoj godini, koja je prethodila predmetnoj koncentraciji ostvarili su slijedeći ukupni prihod, i isti je naveden u Tabeli 1. :

Tabela 1.

<b>Ukupan prihod izražen u KM</b>	<b>Telekom Slovenija</b>	<b>Aneks</b>
<b>Svjetski prihod</b>	(..)** <sup>1</sup>	-
<b>BiH</b>	(..)**	(..)**

Na osnovu podataka o ukupnom ostvarenom prihodu učesnika predmetne koncentracije utvrđeno je postojanje obaveze Prijave namjere koncentracije, obzirom da su ispunjeni kriterijumi ukupnog ostvarenog prihoda privrednih subjekata, učesnika predmetne koncentracije na tržištu roba i / ili usluga na svjetskom tržištu, u godini koja je prethodila predmetnoj koncentraciji, u smislu člana 14. Zakona o konkurenciji.

U postupku ocjene Prijave namjere koncentracije utvrđene su sljedeće činjenice:

### **1. Pravni osnov i oblik koncentracije**

Pravni osnov predmetne koncentracije predstavlja Ugovor o promjeni osnivača pristupanjem i prenosu udjela u preduzeću Aneks (u daljem tekstu: Ugovor), zaključen dana 02.oktobra 2007. godine, između privrednog subjekta Telekom Slovenija (kao kupca) i fizičkog lica, Nebojše Antonijevića (kao prodavca), koji je istovremeno vlasnik 100% udjela u osnovnom kapitalu privrednog subjekta Aneks. Predmetnim Ugovorom, privredni subjekt Telekom Slovenije stiče 70% udjela u osnovnom kapitalu privrednog subjekta Aneks, dok fizičko lice, Nebojša Antonijević, istim Ugovorom stiče 30% udjela osnovnog kapitala u privrednom subjektu Blic.Net. d.o.o. Banja Luka (u daljem tekstu: Blic.Net), koji je u 100% vlasništvu privrednog subjekta Telekom Slovenije.

Pravni oblik predmetne koncentracije je sticanje kontrole ili dominantnog uticaja jednog, privrednog subjekta nad drugim privrednim subjektom i to sticanjem kupovinom većine dionica ili udjela osnovnog kapitala, u skladu sa članom 12.stav (1) tačke b) pod 1) Zakona.

### **2. Učesnici koncentracije**

Učesnici predmetne koncentracije su privredni subjekt Telekom Slovenije d.d., Cigaletova 15, Ljubljana, Republika Slovenija i privredni subjekt Aneks d.o.o., Krajiških brigada 113, Banja Luka, Bosna i Hercegovina.

#### **2.1. Privredni subjekt Telekom Slovenije d.d.**

Privredni subjekt Telekom Slovenije, Cigaletova 15, Ljubljana, Republika Slovenija je dioničko društvo organizovano u skladu sa zakonima Republike Slovenije i registrovan je kod Okružnog suda u Ljubljani, pod brojem 5014018, dana 01.10.1993.godine.

Osnovna djelatnost privrednog subjekta Telekom Slovenije je pružanje usluga iz oblasti telekomunikacija, koje obuhvataju slijedeće usluge: usluge fiksne i mobilne telefonije, internet usluge, obradu podataka i distribuciju kablovskog TV signala.

<sup>1</sup> (..)\*\*- Podaci predstavljaju poslovnu tajnu

U Republici Sloveniji privredni subjekt Telekom Slovenije ima u (..)\*\* vlasništvu slijedeće privredne subjekte: "Mobitel" d.d., "SiOL" d.o.o., "GVO" d.o.o., "Avtenta" d.o.o., "Soline" d.o.o. i "Planet 9" d.o.o. . U 2006. godini privredni subjekt Telekom Slovenije osnovao je privredni subjekt "Tele- dat" d.o.o.

U toku 2006 godine privredni subjekt Telekom Slovenije stekao je većinsko vlasništvo nad privrednim subjektima: "Ipko net" - Kosovo (..)\*\* i "On net" d.o.o. Makedonija (..)\*\*.

Na dan 31.12.2006.godine Republika Slovenija imala je u vlasništvu (..)\*\* dionica ili 62,5268 % privrednog subjekta Telekom Slovenije.

Na tržištu Bosne i Hercegovine privredni subjekt Telekom Slovenije djeluje preko subsidijarnog društva Blic.Net d.o.o. Banja Luka.

Privredni subjekt Blic.Net je društvo sa ograničenom odgovornošću sa sjedištem u Banja Luci, Jevrejska bb, lamela 3/II, registrovan kod Osnovnog suda u Banjoj Luci pod brojem 1-1298-00, dana 31.03.2003.godine.

Osnovna djelatnost privrednog subjekta Blic.Net je pružanje internet usluga.

## **2.2.. Privredni subjekt Aneks d.o.o.,**

Privredni subjekt Aneks d.o.o., Krajiških brigada 113, Banja Luka, Republika Srpska, Bosna i Hercegovina je društvo za inženjering i konsalting export-import d.o.o. i organizovano je u skladu sa zakonima Bosne i Hercegovine. Privredni subjekt Aneks registrovan je u Osnovnom sudu u Banja Luci pod brojem 1-3645-00, dana 19.05.1992.godine.

Osnovna djelatnost privrednog subjekta Aneks je trgovina na veliko računarima, perifernom opremom i softverom, ostale srodne računarske djelatnosti i pružanje usluga iz oblasti telekomunikacija (internet).

Privredni subjekt Aneks osnovan je 1992.godine i proteklih deset godina je jedna od vodećih kompanija iz oblasti planiranja i razvoja računarskih mreža, prodaje opreme potrebne za povezivanje računarskih LAN(Local Area Network) i WAN( Wide Area Network) mreža. U sklopu djelatnosti spada i implementacija IP telefonije.

Pored toga, privredni subjekt Aneks bavi se i prodajom računara, računarskih komponenti i perifernih uređaja.Iz široke palete usluga izdvajaju se atest mreže, usluge održavanja računarskih sistema, konfiguracija sistema, razvoj informacionog sistema.

Privredni subjekt Aneks postao je nosilac Opšte dozvole za pruženje internet usluga 01.04.2002.godine, a 12.04.2006.godine nosilac dozvole mrežnog operatora. Dana 08.05.2006.godine postaje prvi licencirani operator fiksne telefonije u Republici Srpskoj.

Privredni subjekt Aneks nema vlasničkih udjela u drugim privrednim subjektima na teritoriji Bosne i Hercegovine.

## **3. Analiza relevantnog tržišta**

Članom 3. Zakona i čl. 4., 5. i 6. Odluke o utvrđivanju relevantnog tržišta ("Službeni glasnik BiH", broj 18/06) određeno je relevantno tržište određenih proizvoda ili usluga koje su predmet djelovanja privrednih subjekata na relevantnom geografskom tržištu.

Konkurencijsko vijeće je utvrdilo, da je relevantno tržište proizvoda ili usluga, učesnika predmetne koncentracije pružanje internet usluga i usluga fiksne telefonije (kao segmenata telekomunikacijskih usluga) i pružanja usluga iz oblasti računarskih mreža.

Relevantno geografsko tržište za ovu koncentraciju je Bosna i Hercegovina, jer se pružanje internet usluga i usluga fiksne telefonije (kao segmenata telekomunikacijskih usluga) i pružanja usluga iz oblasti računarskih mreža, obavlja na cijeloj teritoriji Bosne i Hercegovine.

Slijedom navedenog, Konkurencijsko vijeće je kao relevantno tržište za predmetnu koncentraciju utvrdilo tržište pružanja internet usluga i usluga fiksne telefonije (kao segmenata telekomunikacijskih usluga) i pružanja usluga iz oblasti računarskih mreža na cijeloj teritoriji Bosne i Hercegovine.

Na osnovu podataka dobijenih putem ankete provedene od strane Regulatorne agencije za komunikacije i na osnovu internih analiza tržišta telekomunikacija, u Bosni i Hercegovini na relevantnom tržištu pružanja internet usluga djeluje veliki broj učesnika, odnosno 52 privredna subjekta koja se bave pružanjem internet usluga. Na osnovu podataka dobijenih od 43 licencirana pružaoca navedenih usluga, u 2006.godini, u Bosni i Hercegovini, bilo je ukupno 237.660 internet pretplatnika.

Prema procjenama Regulatorne agencije za komunikacije najveći tržišni učesnici na relevantnom tržištu pružanja internet usluga (mjereno prema broju pretplatnika) su BiHNet (BH Telekom), Teol (Telekom Srpske) i HT Mostar. Osim njih značajni su Logosoft, Sprinter.net i Blic.Net.

U dijelu Federacije Bosne i Hercegovine koji uglavnom pokriva BH Telekom, sa aspekta tržišnog učešća, infrastrukture i kapaciteta, kao lider se izdvaja BH Telekom (BiHNet), sa privatnim provajderima Logosoft-om, Europronetom i Smartnetom, kao prvim tržišnim konkurentima. BH Telekom pokriva dio populacije od 2.000.000,00 stanovnika. Sa aspekta postojećeg broja ADSL korisnika u Bosni i Hercegovini dominira BiHNet sa oko 5000 korisnika.

Na području Federacije BiH koji pokriva HT Mostar, kao lider se izdvaja HT Mostar i pokriva dio populacije od 500.000,00, dok se u Republici Srpskoj posebno izdvaja Telekom Srpske sa oko 10 % tržišnog učešća i djeluje preko vlastitog internet provajdera Teol, pokrivajući populaciju od otprilike 1.400.000,00 stanovnika. Osim Teola u Republici Srpskoj značajan je i Sprinter, koji djeluje kao sastavni dio Srpskih pošta.

Prema procjeni učesnika predmetne koncentracije privredni subjekt Aneks na relevantnom tržištu pružanja internet usluga na tržištu Bosne i Hercegovine ima tržišno učešće od 0,06 % (oko 160 pretplatnika), dok privredni subjekt Telekom Slovenije preko subsidijarnog privrednog društva Blic.Net ostvaruje tržišno učešće oko 3-4%( oko 8.000 pretplatnika).

Na relevantnom tržištu pružanja usluga iz oblasti fiksne telefonije na tržištu Bosne i Hercegovine, privredni subjekt Aneks ostvaruje neznatno tržišno učešće od 0,1% (obzirom da se radi samo o pružanju usluga terminacije dolaznih međunarodnih poziva kao podsegmentu fiksne telefonije), dok privredni subjekt Telekom Slovenije nije aktivan na ovom relevantnom tržištu i njegov tržišno učešće iznosi 0% .

U fiksnoj telefoniji broj pretplatnika na mjerodavnom tržištu, izražen u procentima je sljedeći: BH Telekom 49,5 %, Telekom Srpska 31,9%, HT Mostar 18,5% i Aneks 0,1%.

Na relevantnom tržištu pružanja usluga iz oblasti računarskih mreža na tržištu Bosne i Hercegovine djeluje veliki broj učesnika.

Privredni subjekt Aneks na relevantnom tržištu pružanja usluga iz oblasti računarskih mreža ostvaruje tržišno učešće od 5-6%, dok privredni subjekt Telekom Slovenije nije aktivan na navedenom relevantnom tržištu, tako da njegov tržišni udio iznosi 0%. Glavni konkurenti privrednog subjekta Aneks, na navedenom relevantnom tržištu su sljedeći privredni subjekti:

"Logosoft" Sarajevo, "Lanaco" Banja Luka, "MKS" Sarajevo, "MKM" Banja Luka, "Digit" Banja Luka, "MIBO" Sarajevo, "Genelec" Tuzla koji zajedno imaju oko 70% tržišnog udjela, dok ostatak tržišta od oko 30%, drži veliki broj malih firmi koje pružaju navedenu vrstu usluge, među kojim je i privredni subjekt Aneks.

#### **4. Procjena predmetne koncentracije**

Konkurencijsko vijeće je na osnovu izvršene analize strukture relevantnog tržišta, tržišnih učesća učesnika koncentracije u smislu člana 17. Zakona, ocijenilo dopuštenom provođenje predmetne koncentracije u skladu sa članom 18.stav (2) tačka a) Zakona .

Pri donošenju ovog Rješenja Konkurencijsko vijeće je posebno imalo u vidu da predmetna koncentracija neće dovesti do značajnih promjena tržišnih učesća, učesnika predmetne koncentracije, odnosno neće dovesti do stvaranja niti jačanja dominantnog položaja učesnika predmetne koncentracije, obzirom da privredni subjekt Telekom Slovenije ne djeluje, odnosno nema tržišnih učesća na relevantnom tržištu Bosne i Hercegovine u oblasti pružanja usluga fiksne telefonije i računarskih mreža, te da će tržišno učešće privrednog subjekta Aneks ostati nepromjenjeno. U ovom slučaju dolazi samo do promjene kontrole nad postojećim učesnikom koncentracije.

Cijeneći sve iznesene činjenice i podake, Konkurencijsko vijeće je utvrdilo da predmetna koncentracija ne sprečava, ograničava niti narušava tržišnu konkurenciju na relevantnom tržištu pružanja intrnet usluga i usluga fiksne telefonije (kao segmenata telekomunikacijskih usluga) i pružanja usluga iz oblasti računarskih mreža u Bosni i Hercegovini te je odlučilo kao u dispozitivu ovog Rješenja.

#### **5. Administrativna taksa**

Na ovo Rješenje Podnosilac prijave u skladu sa Odlukom o administrativnim taksama u vezi sa procesnim radnjama pred Konkurencijskim vijećem ("Službeni glasnik BiH", broj 30/06) i u skladu sa članom 2. Tarifni broj 107 stav (1) tačka d) pod 1) obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

#### **6. Pouka o pravnom lijeku**

Protiv ovog Rješenja nije dozvoljena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

**Predsjednik**

**Sanja Božić**